

Nukissiornermi ikummatissat avatangiisinut akitsuutaat pillugu Inatsisartut inatsisaat

Nukissiornermi ikummatissat assigisaasalu avatangiisinut akitsuutaat

§ 1. Uuliat aatsitassanit pisut, aamarsuit gassillu Kalaallit Nunaanni kiassarnermut innaallagissiornermullu atorneqartut kiisalu motorinut ikummatissatut atorneqartut avatangiisinut akitsuummik akitsuuserneqartassapput.

Imm. 2. Avatangiisinut akitsuut ima annertussuseqarpoq:

1) Solaarit suulluunniit, ilanngullugit petruuliu, Jet A 1 assigisaallu	Liiterimut 15° C-imi	0 kr. 10 øre
2) Fueluulia	Tonsimut	113 kr. 80 øre
3) Motorinut benziinat suulluunniit, ilanngullugit timmisartut orsussaaf assigisaallu	Liiterimut 15° C-imi	0 kr. 10 øre
4) Gassit suulluunniit, ilanngullugit naturgassi, bygassi assigisaallu, gassili Nm3-mut puiaasamiittoq pinnagu		110 kr. 40 øre
5) Aamarsuit suulluunniit, ilanngullugit stenkul, jordoliekoks, brunkul, qisummit usserusiat (trætjære) assigisaallu	Tonsimut	73 kr. 40 øre

Imm. 3. Ikummatissap, ikummatissat imm. 2-mi taaneqartut imaluunniit ikummatissat taakku nioqutissallu allat atorlugit akuukkap avatangiisinut akitsuutaa tassaavoq nioqutissap inatsit una naapertorlugu qaffasinnerpaamik akitsuutillip akitsuutaa, akuugaq kiassarnermut innaallagissiornermullu imaluunniit motorimut ikummatissatut atorneqarsinnaappat.

Imm. 4. Taamaattorli uuliakup imermik akullip umiarsuarni katersap, aammalu kiassarnermut innaallagissiornermulluunniit atorneqartup atorneqartussatulluunniit naatsorsuussap avatangiisinut akitsuutaa tassaavoq imm. 2, nr. 1 malillugu akit procentiat imaattoq:

- 1) 35 pct. imermik 65 pct.-imik taannaluunniit sinnerlugu akulik.
- 2) 70 pct. imermik minnerpaamik 30 pct.-imik aamma 65 pct. inorlugu akulik.
- 3) 95 pct. imermik minnerpaamik 5 pct.-imik aamma 30 pct. inorlugu akulik.
- 4) 100 pct. imermik 5 pct. inorlugu akulik.

§ 2. Nioqutissat Kalaallit Nunaanni piiakkat sulialluunniit kiisalu nioqutissat akitsuuteqarfusumut eqqunneqarnerminni, kiassarnermut, innaallagissiornermut imaluunniit motorimut ikummatissatut atorneqartussaanatik allanut atorneqartussatut naatsorsuussat, tak. nioqutissanik eqqussuineq annissuinerlu pillugit Inatsisartut inatsisaanni § 6, siunertanut taaneqartunut ikummatissanngortinneqarpata akitsuummik akiliisussaataaneq atuutilissaaq.

Imm. 2. Nioqqutissat akitsuuteqarfiusumut eqqunneqarnerminni kiassarnermut, innaallagissionermut imaluunniit motorimut ikummatissatut atorineqartussatut naatsorsuussat akitsuuteqarfiusumut eqqunneqarneranni akitsuummik akiliisussaatitaaneq atuutilissaaq.

Imm. 3. Avatangiisinut akitsuut akitsuummik akiliisussaatitaanerup atuutilernerani akilerneqartussanngussaaq.

Suliffeqarfinnik assigisaannillu nalunaarsuineq

§ 3. Suliffeqarfiit ingerlataminnut atatillugu nioqqutissanik akitsuusigassanik piiasut, suliaqartut eqqussuisulluunniit uninngasuutinik peqqumaasivittut akileraaruseriffimmi nalunaarsorneqassapput.

Imm. 2. Suliffeqarfiit allat nioqqutissanik akitsuusigassanik atuisartut uninngasuutinik peqqumaasivittut akileraaruseriffimmi nalunaarsorneqarsinnaapput, nioqqutissanut akitsuusigassanut uninngatitsivissamik minnerpaamik 1.000 m³-imik annertussuseqartumik peqqumaasiveqarunik. Suliffeqarfiit arlallit ataatsimoorussamik peqqumaasiveqarunik, peqqumaasiviup ilaata atukkamik annertussusia naapertorlugu akitsuummik akiliissapput.

Imm. 3. Uninngasuutinik peqqumaasiviusut nalunaarsornissaannut Naalakkersuisut erseqqinnerusunik maleruagassiorsinnaapput.

§ 4. Suliffeqarfiit aamma ingerlatsiviit assigisaallu uninngasuutinik peqqumaasivittut nalunaarsorneqarsimanngitsut, kiisalu inuit ataasiakkaat nioqqutissanik akitsuusigassanik piiasut, suliaqartut eqqussuisulluunniit akitsuummik akiliisussaatitaanerup atuutilernerani akileraaruseriffimmut nalunaaruteqassapput.

Piffissaq akitsuusiiffissaq aamma akitsuusigassat naatsorsorneqarnerat

§ 5. Uninngasuutinik peqqumaasivittut nalunaarsorneqarsimasut piffissaq akitsuusiiffissaat tassaavoq qaammat.

§ 6. Toqqortuisutut nalunaarsorneqarsimasut nioqqutissat akitsuuteqartut kiassarnermi, innaallagissionermi ikummatitut motorinulluunniit orsussatut atorineqarsimasut annaasanik assigisaannillu tapeqartillugit piffissamut akitsuuteqarfiusumut, takuuk § 2, imm. 1, imaluunniit akitsuuteqarfiusumut eqqussaasimasut, takuuk § 2, imm. 2, naatsorsuusiussavaat. Naatsorsuinerit akileraaruseriffiup aalajangersagaanik malittarisassat malillugit immikkoortitigaallutik nalunaarsugaassapput.

Imm. 2. Pisuni allani akitsuusigassat tassaapput nioqqutissat suliffeqarfiup imaluunniit inuup pisuni ataasiakkaani pissarsiarisimasai tigusimasaaluunniit.

Imm. 3. Naalakkersuisut uninngasuutinik peqqumaasivittut nalunaarsorneqarsimasut akitsuusigassanik qanoq naatsorsuisarnissaat pillugu maleruagassanik erseqqinnerusunik aalajangersaasinnaapput.

§ 7. Akitsuusigassanit § 6, imm. 1 naapertorlugu naatsorsorneqartunit ilanngaatineqassapput
1) nioqqutissat akitsuuteqarfiusup avataanut anninneqartut,

2) nioqqutissat suliffeqarfimmi, suliffeqarfimmulluunniit angallanneranni ikuallattoornikkut, ernartoonnikkut, assigisaanilluunniit pisoqarneragut annaasaqaatit.

Akiliisussaatitaaneq

§ 8. Akitsuummik § 2, imm. 1-mi pineqartumik akiliisussaatitaavoq akitsuummik akiliisussaatitaanerup atuutilernerani nioqqutissamik piginnittoq.

Imm. 2. Akitsuummik § 2, imm. 2-mi pineqartumik akiliisussaatitaavoq akitsuummik akiliisussaatitaanerup atuutilernerani nioqqutissamik pigisaqalersutut nalunaarneqarsimasoq.

Naatsorsuusiorneq pillugu aalajangersakkat

§ 9. Toqqortuisut § 3, imm. 1 malillugu nalunaarsugaasut, nioqqutissat, pissarsiarineqartut, sananeqartut eqqunneqartulluunniit pillugit, aammalu tunineqartut aammalu § 7 naapertorlugu atorineqartut pillugit naatsorsuusiussapput.

Imm. 2. Allat uninngasuutiniq peqqumaasivittut § 3, imm. 2 naapertorlugu nalunaarsorneqarsimasut nioqqutissat akitsuusigassat pigilikkatik, tunisatit suliffeqarfimmilu atukkatik naatsorsuuteqartissavaat.

Imm. 3. Uninngasuutiniq peqqumaasivittut nalunaarsorneqarsimasup tunisaqarnerani pisiat allagartaanni paasissutissatut allassimassapput ulloq akiligassat allagartaata sananeqarfia, nioqqutissanik tunisisup aqqa, pisisup aqqa, nioqqutissap sumut tunniunneqarnera, nioqqutissap suunera annertussusialu kiisalu avatangiisinut akitsuutip annertussusia.

Imm. 4. Suliffeqarfiit assigisaasalu naatsorsuutit, matumani ilanngullugit pisiat allagartaat, pisiat allagartaasa assilinerarneri naatsorsuinerillu ukiup naatsorsuusiortiusup naanerata kingorna ukiuni tallimani toqqortarissavaat.

Avatangiisinut akitsuummik akiliineq

§ 10. Uninngasuutiniq peqqumaasivittut nalunaarsorneqarsimasut piffissat akitsuusiiffissat naanerisa kingorna kingusinnerpaamik qaammatit ulluisa 15-ianni nioqqutissat akitsuusigassat qanoq annertutigineri akileraaruseriffimmut nalunaarutigisassavaat, tak. § 6, imm. 1 aamma § 7. Avatangiisinut akitsuut piffissat akitsuusiiffissat naanerisa kingorna kingusinnerpaamik qaammatit arfinilissaata ulluisa 15-ianni akileraaruseriffimmut akilernerqartassaaq.

Imm. 2. Akitsuummik akiliisussaatitaasut § 4-mi taaneqartut avatangiisinut akitsuut, akitsuummik akiliisussaatitaanerup atuutilernerata kingorna kingusinnerpaamik ullut 14-it qaangiunneranni akileraaruseriffimmut akilertassavaat. Nioqqutissat qanoq annertutigisut avatangiisinut akitsuuserneqarnissaannik naatsorsuineq § 6, imm. 2-mi maleruagassat naapertorlugit pissaaq.

§ 11. Uninngasuutiniq peqqumaasivittut nalunaarsorneqarsimasoq avatangiisinut akitsuummik piffissaagallartillugu akiliisimanngitsaq, akileraaruseriffimmit peqquneqarsinnaavoq nioqqutissat tigneranni nalunaaruteqartaleqqullugu. Aamma akileraaruseriffiup suliffeqarfik peqqusinnaavaa avatangiisinut akitsuut nioqqutissat tigneranni akilertaleqqullugu.

§ 12. Nioqqutissat akitsuusigassat avatangiisinut akitsuummik inatsit naapertorlugu akilerneqarsimasussaagaluamik akiliinani tunineqarsimappata, pigineqalersimappata atorineqarsimappataluunniit aningaasat akilinngitsoorneqarsimasut akileeqqusinnermiit kingusinnerpaamik ullut 14-it qaangiunneranni akileqquneqassapput. Aningaasat akilinngitsoorneqarsimasut annertussusiat suliffeqarfiup naatsorsuutai tunngavigalugit naatsorsorneqarsinnaanngippat, akileraaruseriffiup missingersuinnermigut angissusilersinnaavaa.

Pineqaatissiissutit

§ 13. Kinaluunniit piaaraluneerluni imaluunniit mianersuaalliorujussuarluni iliuseqartoq akiliisinneqassaaq

1) akitsuutini nakkutilliinnermi atugassanik imaluunniit akitsuummik utertitassamik tunniussinissamut tunngavissaq pillugu eqqunngitsunik paasinerluutaasinnaasunilluunniit paasissutissiisoq imaluunniit paasissutissanik nipangiussisoq,

2) § 3, imm. 1-imik, § 4-mik, imaluunniit § 9, imm. 1-imiit 4-mut unioqqutitsisoq,

3) § 11, oqaaseqatigiinni siullerni peqqusinnermik nalunaarutigeriikkamik malinninngitsoq,

4) nioqqutissanik avatangiisinut akitsuummik inatsit naapertorlugu akilerneqarsimasussaagaluamik akiliinani tunisoq, pigisaqalersoq, pissarsisoq imaluunniit atuisoq, taamaaliorialuartorluunniit.

Imm. 2. Selskabi assigisaalu imm.1-imik unioqqutitsisuuppata Kalaallit Nunaanni pinerluttulerinnermik inatsimmi kapitali 5-imi maleruagassat naapertorlugit pinerluutitut akisussaatisisoqarsinnaavoq.

§ 14. Akileraaruseriffik isumaqarpat unioqqutitsineq akiliisitaanermit sakkortunerusumik pineqaatitaqartariaqanngitsoq, taava Naalakkersuisut taakkualuunniit taamaaliornissamut piginnaatitaata pineqartoq nalunaarfigissavaa suliassaq eqqartuussisutigoortitsinertaqanngitsumik innerneqarsinnaasoq ilumut unioqqutitsisimanini paasippagu aammalu piffissaatitap erseqqinnerusumik aalajangikkaq, qinnuteqarnikkut sivitsorneqarsinnaasup qaangiutinnginnerani akiliutissamik nalunaarummi taaneqartumik akiliiumappat.

Imm. 2. Paasisitsissut imm. 1-imi taaneqartoq pillugu Kalaallit Nunaanni eqqartuussisarnermik inatsimmi maleruagassat unnerluussutip imarisai pillugit taamaallutik atuutissapput.

Imm. 3. Akiliutissaq piffissaagallartillugu akilerneqarluniluunniit isumaqatigiissuteqartoqarneratigut tiguniarneqarsimappat qanoq iliuseqartoqaaqqissanngilaq.

§ 15. Maleruagassiani inatsit una naapertorlugu atulersinneqarsimasuni, maleruagassiani aalajangersakkanik unioqqutitsinerit akiliisitaanermik pillarneqarnissaannik aalajangersaasoqarsinnaavoq.

Imm. 2. Maleruagassiani inatsit una naapertorlugu atulersinneqarsimasuni selskabit assigisaallu Kalaallit Nunaanni pinerluttulerinnermik inatsimmi kapitali 5-imi maleruagassat naapertorlugit pinerluutitut akisussatinneqarsinnaapput.

§ 16. § 13 aamma § 15 naapertorlugit akiliutissanngortitat landskarsip pisassarai.

Atortuulertia

§ 17. Inatsit atortuulissaaq 1. januar 2011, atuutissallunilu nioqqutissanut 1. januar 2011-miit kingusinnerusukkulluunniit akitsuusigassaalersussanut.

Kalaallit Nunaanni Namminersorlutik Oqartussat, ulloq 18. november 2010

Kuupik Kleist

/

Palle Christiansen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut